

Na osnovu člana 13. stav 3. Zakona o cestovnom prijevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

PRAVILNIK

O LICENCI ZA OBAVLJANJE JAVNOG PRIJEVOZA U CESTOVNOM PROMETU (Službene novine Federacije BiH, broj 65/06)

I. OPĆE ODREDBE

Član 1.

Ovim Pravilnikom propisuju se kategorije licenci, uvjeti, način i postupak izdavanja licence za obavljanje javnog prijevoza u cestovnom prometu (u daljnjem tekstu: licenca), obrasca licence za vozilo i iskaznice za vozača, rok važenja licence, obrasci licence za vozilo i iskaznice za vozača, nadležni organ za izdavanje licence, način i postupak izdavanja licence, način i postupak obnavljanja, oduzimanja i prestanak važenja licence, vojenje evidencije o izdatim i oduzetim licencama, te prelazne i završne odredbe.

Član 2.

U cestovnom prometu postoje slijedeće kategorije licenci za prijevoznika:

- Licenca "A" - za linijski prijevoz putnika,
- Licenca "B" - za vanlinijski prijevoz putnika,
- Licenca "C" - za prijevoz tereta,
- Licenca "D" - za taksi prijevoz.

Član 3.

Licenca iz člana 2. ovog Pravilnika u formi rješenja izdaje nadležno kantonalno ministarstvo iz oblasti prometa na pismeni zahtjev prijevoznika ukoliko prijevoznik ispunjava uvjete propisane odredbama ovog Pravilnika.

Oblik i sadržaj rješenja iz stava 1. ovog člana dat je u prilogu ovog Pravilnika i čini njegov sastavni dio.

Član 4.

Za svako vozilo koje posjeduje važeće rješenje o ispunjavanju propisanih tehničko-eksploatacionih uvjeta, prijevozniku koji je dobio rješenje iz člana 3. stav 1. ovog Pravilnika izdaje se obrazac licence i to:

- za linijski i vanlinijski prijevoz putnika - AB;
- za vanlinijski prijevoz putnika - B;
- za prijevoz tereta - C;
- taksi prijevoz - D.

Prijevoznik koji ispunjava uvjete za linijski prijevoz putnika stiče pravo obavljanja i vanlinijskog prijevoza putnika, te dobija obrazac licence za vozilo sa oznakom AB.

Obrazac licence za vozilo koje je prijevoznik kupio po osnovu ugovora o leasing-u, ako je prijevoznik ispunio uvjete za dobijanje licence, ne može se izdati na rok koji je duži od roka na koji je sklopljen ugovor o leasing-u ili roka važenja rješenja iz člana 3. stav 1. ovog Pravilnika.

Po isteku ugovora o leasing-u, prijevoznik je dužan prevesti vozilo u svoje vlasništvo i nakon registracije zamijeniti obrazac licence po osnovu nove registracije.

Član 5.

Licenca se izdaje prijevozniku na period od pet godina.

Obrazac licence za vozilo izdaje se u zavisnosti od starosti vozila, odnosno isteka utvrđene starosti za vozilo kojim se obavlja javni prijevoz i to:

- a) za autobuse i teretna vozila na period od:
- 5 godina za vozila starosti do navršenih 10 godina;
 - 3 godine za vozila starosti 10 do 20 godina;
 - 1 godinu za vozila starosti preko 20 godina;
 -
- b) za putničke automobile kojima se vrši taksi prijevoz na period od:
- - 5 godina za vozila starosti do navršenih 15 godina;
 - 3 godine za vozila starosti 15-20 godina,
 - 1 godinu za vozila starosti preko 20 godina.
 -

Obrazac licence za vozilo prijevoznik može produžiti u predviđenim periodima iz stava 2. tač. a) ili b) ovog člana, ukoliko dostavi dokaze o izmirenim obavezama po osnovu javnih prihoda, te dokaze da vozilo kojim se obavlja prijevoz ispunjava uvjete propisane ovim Pravilnikom.

Član 6.

Za svakog vozača koji je zaposlen kod prijevoznika, odnosno samostalno obavlja djelatnost javnog prijevoza i ispunjava uvjete iz člana 9. Zakona o cestovnom prijevozu Federacije Bosne i Hercegovine (u daljnjem tekstu: Zakon) izdaje se identifikaciona kartica - (u daljnjem tekstu: iskaznica) koja sadrži lične podatke vozača sa fotografijom, kategoriju za koju važi vozačka dozvola, završenu stručnu spremu, naziv prijevoznika kod kojeg je vozač zaposlen, datum izdavanja, potpis i pečat izdavaoca.

Iskaznicu izdaje nadležno kantonalno ministarstvo iz oblasti prometa na pismeni zahtjev prijevoznika.

Iskaznica vrijedi dok je vozač u radnom odnosu na mjestu vozača kod tog prijevoznika, odnosno dok obavlja djelatnost za koju je dobio iskaznicu.

Iskaznica za vozača ima dimenzije 10 x 7,5 cm, data je u prilogu ovog Pravilnika i čini njegov sastavni dio.

Član 7.

Prijevoznik koji je ispunio uvjete i dobio licencu za međunarodni prijevoz, nema obavezu podnošenja zahtjeva za dobijanje licence po osnovu ovog Pravilnika i može obavljati prijevoz unutar Federacije Bosne i Hercegovine na osnovu međunarodne licence.

Prijevoznik koji je dobio licencu za međunarodni prijevoz, unutar Federacije Bosne i Hercegovine može obavljati prijevoz samo vozilima za koje je izdata međunarodna licenca za vozilo.

Ukoliko prijevoznik iz stava 2. ovog člana u vlasništvu ima vozila za koja nema izdatu međunarodnu licencu za vozilo, obavezan je za takvo vozilo posjedovati obrazac licence koji se izdaje na osnovu ovog Pravilnika.

Rok važenja obrazaca licence iz stava 3. ovog člana ne može biti duži od roka važenja međunarodne licence ili rokova utvrđenih ovim Pravilnikom.

Osoba u radnom odnosu na mjestu vozača kod prijevoznika iz stava 1. ovog člana koja nema iskaznicu izdatu po osnovu međunarodne licence, mora imati iskaznicu izdatu na način propisan ovim Pravilnikom.

II. UVJETI ZA IZDAVANJE LICENCE PRIJEVOZNIKU ZA OBAVLJANJE POJEDINIH VRSTA PRIJEVOZA U CESTOVNOM PROMETU

Član 8.

Za izdavanje Licence "A" prijevoznik mora ispuniti slijedeće uvjete:

- a) da je upisan u sudski registar za obavljanje javnog prijevoza putnika,
- b) da posjeduje najmanje dva registrovana autobusa u vlasništvu ili kupljena po osnovu ugovora o leasing-u, koji ispunjavaju uvjete iz čl. 5. i 6. Zakona,
- c) da raspolaže kapitalom od 100 KM po sjedištu autobusa za vrijeme važenja licence, s tim što u vrijednost kapitala ne ulazi vrijednost autobusa,
- d) da prijevoznik u posljednjoj godini dana od dana podnošenja zahtjeva za izdavanje licence nije više od jednom kažnjen za prekršaj iz Zakona na osnovu kojeg je sud pravosnažnim rješenjem izrekao zaštitnu mjeru zabrane obavljanja djelatnosti,
- e) da prijevoznik ispunjava i druge uvjete i to:
 - da ima poslovnu prostoriju ili poslovni prostor sa telefonom i telefaksom,
 - da ima istaknut naziv privrednog društva na poslovnoj prostoriji ili poslovnom prostoru,
 - da ima vlastiti ili na osnovu ugovora osiguran prostor za održavanje vozila,
 - da ima vlastiti ili na osnovu ugovora osiguran prostor za parkiranje vozila koji ne smije biti dio javne ceste ili javnog parkirališta,
- f) da prijevoznik posjeduje poreski broj i da uredno izmiruje obaveze u pogledu plaćanja javnih prihoda.

Član 9.

Za izdavanje Licence "B" prijevoznik mora ispuniti slijedeće uvjete:

- a) da je upisan u sudski registar za obavljanje javnog prijevoza putnika ili da posjeduje obrtnicu za obavljanje javnog prijevoza putnika,
- b) da posjeduje najmanje jedan registrovan autobus u vlasništvu ili kupljen po osnovu ugovora o leasing-u, koji ispunjava uvjete iz čl. 5. i 6. Zakona,
- c) da raspolaže kapitalom od 100 KM po sjedištu autobusa za vrijeme važenja licence, s tim da u vrijednost kapitala ne ulazi vrijednost autobusa,
- d) da prijevoznik u posljednjoj godini dana od dana podnošenja zahtjeva za izdavanje licence nije više od jednom kažnjen za prekršaj iz Zakona na osnovu kojeg je sud pravosnažnim rješenjem izrekao zaštitnu mjeru zabrane obavljanja djelatnosti,
- e) da prijevoznik ispunjava i druge uvjete i to:
 - da ima poslovnu prostoriju ili poslovni prostor sa telefonom i telefaksom,
 - da ima istaknut naziv privrednog društva na poslovnoj prostoriji ili poslovnom prostoru,
 - da ima vlastiti ili na osnovu ugovora osiguran prostor za održavanje vozila,

- da ima vlastiti ili na osnovu ugovora osiguran prostor za parkiranje vozila koji ne smije biti dio javne ceste ili javnog parkirališta,
- f) da prijevoznik posjeduje poreski broj i da uredno izmiruje obaveze u pogledu plaćanja javnih prihoda.

Član 10.

Za izdavanje Licence "C" prijevoznik mora ispunjavati slijedeće uvjete:

- a) da je upisan u sudski registar za obavljanje javnog prijevoza tereta ili da posjeduje obrtnicu za obavljanje javnog prijevoza tereta,
- b) da posjeduje najmanje jedno teretno motorno vozilo ili skup vozila u vlasništvu ili kupljeno po osnovu ugovora o leasing-u, koji ispunjava uvjete iz čl. 5. i 6. Zakona,
- c) da raspolaže kapitalom od 100 KM po toni nosivosti motornog vozila, odnosno skupa vozila za vrijeme važenja licence, s tim što u vrijednost kapitala ne ulazi vrijednost vozila,
- d) da prijevoznik u posljednjoj godini dana od dana podnošenja zahtjeva za izdavanje licence nije više od jednom kažnjen za prekršaj iz Zakona na osnovu kojeg je sud pravosnažnim rješenjem izrekao zaštitnu mjeru zabrane obavljanja djelatnosti,
- e) da prijevoznik ispunjava i druge uvjete i to:
 - da ima poslovnu prostoriju ili poslovni prostor sa telefonom i telefaksom,
 - da ima istaknut naziv privrednog društva na poslovnoj prostoriji ili poslovnom prostoru,
 - da ima vlastiti ili na osnovu ugovora osiguran prostor za održavanje vozila,
 - da ima vlastiti ili na osnovu ugovora osiguran prostor za parkiranje vozila koji ne smije biti dio javne ceste ili javnog parkirališta,
- f) da prijevoznik posjeduje poreski broj i da uredno izmiruje obaveze u pogledu plaćanja javnih prihoda.

Član 11.

Za izdavanje Licence "D" prijevoznik mora ispunjavati slijedeće uvjete:

- a) da je upisan u sudski registar za obavljanje taksi prijevoza ili da posjeduje obrtnicu za obavljanje taksi prijevoza,
- b) da posjeduje najmanje jedno putničko vozilo u vlasništvu ili kupljeno po osnovu ugovora o leasing-u, koje ispunjava uvjete iz čl. 5. i 6. Zakona,
- c) da raspolaže kapitalom od 500 KM po sjedištu putničkog vozila za vrijeme važenja licence, s tim što u vrijednost kapitala ne ulazi vrijednost vozila,
- d) da prijevoznik u posljednjoj godini dana od dana podnošenja zahtjeva za izdavanje licence nije više od jednom kažnjen za prekršaj iz Zakona na osnovu kojeg je sud pravosnažnim rješenjem izrekao zaštitnu mjeru zabrane obavljanja djelatnosti,
- e) da prijevoznik ispunjava i druge uvjete i to:
 - da ima poslovnu prostoriju ili poslovni prostor sa telefonom i telefaksom,
 - da ima istaknut naziv privrednog društva na poslovnoj prostoriji ili poslovnom prostoru,
 - da ima vlastiti ili na osnovu ugovora osiguran prostor za održavanje vozila,

- da ima vlastiti ili na osnovu ugovora osiguran prostor za parkiranje vozila, koji ne smije biti dio javne ceste ili javnog parkirališta,

f) da prijevoznik posjeduje poreski broj i da uredno izmiruje obaveze u pogledu plaćanja javnih prihoda.

Izuzetno, odredbi stava 1. tačka c) ovog člana ne primjenjuje se na samostalnog prijevoznika - fizičko lice koje obavlja taksi prijevoz.

Član 12.

Izuzetno od odredbi tačke e) u čl. 9., 10. i 11. ovog Pravilnika samostalni prijevoznik - fizičko lice mora ispunjavati uvjete i to da posjeduje:

- adresu prebivališta i
- telefon.

III. NAČIN I POSTUPAK IZDAVANJA LICENCE

Član 13.

Prijevoznik podnosi zahtjev za izdavanje licence organu nadležnom za izdavanje licence iz člana 3. ovog Pravilnika sa slijedećim podacima:

1. naziv prijevoznika, sjedište sa adresom i telefonom,
2. vrsta prijevoza za koji se traži licenca.

Uz zahtjev za izdavanje licence prijevoznik prilaže vjerodostojne dokaze o ispunjavanju propisanih uvjeta iz čl. 8., 9., 10. ili 11. ovog Pravilnika u zavisnosti od kategorije tražene licence.

Član 14.

Ispunjavanje propisanih uvjeta iz čl. 8. tačka a), 9. tačka a), 10. tačka a) i 11. tačka a) ovog Pravilnika prijevoznik dokazuje na osnovu ovjerenih kopija Rješenja o upisu poslovnog subjekta u sudski registar sa svim priložima, odnosno ovjerene kopije rješenja ili obrtnice za obavljanje javnog prijevoza.

Ispunjavanje propisanih uvjeta iz čl. 8. tačka b), 9. tačka b), 10. tačka b), i 11. tačka b) ovog Pravilnika prijevoznik dokazuje na osnovu ovjerene kopije saobraćajne dozvole za vozilo ili knjižice vozila ili vlasničke knjižice, a za vozilo kupljeno na leasing, još i ovjerene kopije ugovora o leasing-u, te rješenja o ispunjavanju tehničko-eksploatacionih uvjeta za vozila kojima se vrše pojedine vrste prijevoza.

Ispunjavanje propisanih uvjeta iz čl. 8. tačka c), 9. tačka c), 10. tačka c) i 11. tačka c) ovog Pravilnika prijevoznici dokazuju:

- ugovorom o namjenski vezanom depozitu u banci, ili
- izvatom iz zemljišne knjige, ili
- originalnom potvrdom banke ili druge finansijske institucije o izdatoj garanciji, ili
- pismenim mišljenjem vještaka o opredmećenim osnovnim sredstvima, ili
- bilansom stanja, potvrdom nadležne općinske uprave prihoda ili potvrdom o visini raspoloživih sredstava.

Ispunjavanje uvjeta iz čl. 8. tačka d), 9. tačka d), 10. tačka d) i 11. tačka d) ovog Pravilnika dokazuje se potvrdom nadležnog suda.

Ispunjavanje uvjeta iz čl. 8. tačka e), 9. tačka e), 10. tačka e) i 11. tačka e) ovog Pravilnika prijevozniku utvrđuje nadležno kantonalno ministarstvo i izdaje rješenje na osnovu zapisnika koji je sačinjen u sjedištu, odnosno mjestu prebivališta prijevoznika.

Ispunjavanje uvjeta iz čl. 8. tačka f), 9. tačka f), 10. tačka f) i 11. tačka f) ovog Pravilnika utvrđuje se na osnovu potvrde nadležne kantonalne porezne uprave.

Ispunjavanje uvjeta iz člana 12. alineja 1. ovog Pravilnika prijevoznik-fizičko lice dokazuje potvrdom o mjestu prebivališta izdatom od strane Direkcije CIPS-a.

Ispunjavanje uvjeta iz člana 12. alineja 2. ovog Pravilnika prijevoznik-fizičko lice dokazuje ovjerenom kopijom računa za telefon za prethodni mjesec od dana podnošenja zahtjeva koji glasi na ime fizičkog lica.

Član 15.

Ako nadležno ministarstvo utvrdi da podnosilac zahtjeva ne ispunjava uvjete za izdavanje licence, izdat će o tome rješenje.

Protiv rješenja iz stava 1. ovog člana prijevoznik može izjaviti žalbu federalnom ministru prometa i komunikacija putem nadležnog kantonalnog ministarstva u roku od 15 dana od dana prijema rješenja.

Član 16.

Ako nadležni organ u postupku rješavanja zahtjeva za izdavanje licence ustanovi nedostatke, pismeno će pozvati podnosioca zahtjeva da zahtjev dopuni.

U pozivu za dopunu zahtjeva potrebno je tačno navesti u čemu se sastoje nedostaci. Rok za dopunu je 15 dana.

Ako podnosilac zahtjeva u ostavljenom roku zahtjev ne dopuni, smatraće se da zahtjev nije ni podnesen.

Član 17.

Ukoliko nadležni organ za izdavanje licence utvrdi da su ispunjeni svi ovim Pravilnikom propisani uvjeti za izdavanje licence, izdat će podnosiocu zahtjeva iz člana 13. ovog Pravilnika rješenje iz člana 3. ovog Pravilnika u roku od 30 dana od dana podnošenja zahtjeva.

Troškove pribavljanja dokaza o ispunjavanju uvjeta iz čl. 8., 9., 10. i 12. ovog Pravilnika, kao i troškove postupka rješavanja zahtjeva iz člana 13. ovog Pravilnika snosi podnosilac zahtjeva u skladu s kantonalnim propisima o upravnim taksama i tarifama upravnih taksi i odlukama nadležnih ministarstava.

Član 18.

Na osnovu rješenja o dodjeli licence, u zavisnosti od kategorije licence i ispunjenih uvjeta iz člana 14. stav 2. ovog Pravilnika, prijevozniku se izdaje obrazac licence za vozilo.

Prijevozniku se ne može izdati obrazac licence "C" za vučno vozilo-tegljač ukoliko ne posjeduje jedno licencirano priključno vozilo, koje sa tim tegljačem predstavlja skup vozila.

Obrasci licence za vozila štampani su na formatu A4 u slijedećim bojama:

- za licencu "A": plave boje sa oznakom AB,
- za licencu "B": roza boje sa oznakom B,

- za licencu "C": zelene boje sa oznakom C,
- za licencu "D": žute boje sa oznakom D.

Obrasci licence za vozilo dati su u prilogu ovog Pravilnika i čine njegov sastavni dio.

Član 19.

Prijevoznik je dužan o promjeni podataka na osnovu kojih je izdata licenca ili obrazac licence za vozilo izvijestiti nadležno kantonalno ministarstvo u roku od 8 (osam) dana od dana nastanka promjene.

U slučaju da je obrazac licence za vozilo izgubljen, prijevoznik je dužan u roku od tri dana isti oglasiti nevažećim i zatražiti od izdavaoca licence izdavanje novog obrasca licence za vozilo.

Član 20.

Za vozila koja su kupljena po osnovu ugovora o leasing-u, licencu, obrazac licence za vozilo i rješenje o ispunjavanju tehničko-eksploatacionih uvjeta za vozilo prijevozniku će izdati nadležno ministarstvo kantona u kojem se nalazi sjedište prijevoznika koji kupuje vozilo.

IV. POSTUPAK I NAČIN OBNAVLJANJA, ODUZIMANJA I PRESTANKA VAŽENJA LICENCE

Član 21.

Prijevoznik je dužan najmanje tri mjeseca prije isteka licence podnijeti zahtjev za obnavljanje licence i priložiti dokaze o ispunjavanju uvjeta iz čl. 8., 9., 10. ili 12. ovog Pravilnika.

Član 22.

Nadležni organ za izdavanje licence rješenjem će oduzeti licencu prijevozniku ako utvrdi da prijevoznik ne ispunjava propisane uvjete za izdavanje licence.

U slučaju raskida ugovora o leasing-u, nadležni organ za izdavanje licence oduzet će obrazac licence za svako vozilo koje je kupljeno po osnovu ugovora o leasing-u, danom njegovog raskida.

Kada inspektor za cestovni promet utvrdi da prijevoznik ne ispunjava uvjete propisane ovim Pravilnikom, o tome sačinjava zapisnik i dostavlja ga izdavaocu licence.

Izdavalac licence, na osnovu zapisnika inspekcije za cestovni promet i provedenog postupka izdaje rješenje o oduzimanju licence. Po pravosnažnosti rješenja o oduzimanju licence, prijevoznik je dužan vratiti sve obrasce licence za vozila i iskaznice za vozača u roku od osam dana.

Član 23.

Kada inspektor utvrdi da prijevoznik obavlja prijevoz suprotno izdatoj licenci ili obavlja taksi prijevoz bez dopunske taksi oznake iz člana 42. Zakona sačiniti će zapisnik kojeg dostavlja izdavaocu licence.

Izdavalac licence, na osnovu zapisnika inspekcije za cestovni promet i provedenog postupka izdaje rješenje o oduzimanju obrasca licence za vozilo kojim je učinjen prekršaj.

Ukoliko taksi prijevoz obavlja fizičko lice bez taksi oznake iz člana 42. Zakona, pored oduzimanja obrasca licence za vozilo, izdavalac licence oduzima i licencu prijevozniku.

Po pravosnažnosti rješenja o oduzimanju obrasca licence za vozilo, odnosno oduzimanju licence i obrasca licence za vozilo, prijevoznik je dužan vratiti oduzeti obrazac licence za vozilo u roku od osam dana.

U slučaju oduzimanja obrasca licence novi obrazac licence za vozilo toga prijevoznika izdaće se samo na osnovu dobijene taksi oznake iz propisa nadležnog ministarstva donesenog na osnovu člana 42. Zakona.

Član 24.

Izdavalac licence dužan je pismeno obavještavati Federalno ministarstvo prometa i komunikacija i nadležne inspekcije za cestovni promet o oduzimanju licence i obrasca licence za vozilo, po pravosnažnosti rješenja iz čl. 22. i 23. ovog Pravilnika.

Član 25.

Licenca prestaje važiti:

- a) danom odjave,
- b) danom brisanja prijevoznika iz sudskog registra, odnosno iz registra odobrenja za obavljanje djelatnosti javnog prijevoza kao samostalne djelatnosti,
- c) danom isteka roka važenja licence,
- d) danom pravosnažnosti rješenja izdatog na osnovu člana 22. ovog Pravilnika.

Obrazac licence za vozilo kupljeno po osnovu ugovora o leasing-u prestaje da važi:

- a) danom pravosnažnosti rješenja o oduzimanju obrasca licence za vozilo.

Obrazac licence za vozilo kupljeno po osnovu ugovora o leasing-u prestaje da važi:

- a) danom raskida ugovora o leasing-u,
- b) danom isteka ugovora o leasing-u.

V. EVIDENCIJA IZDATIH LICENCI

Član 26.

Evidenciju izdatih licenci i obrazaca licenci za vozila vodi organ nadležan za izdavanje licenci iz člana 3. ovog Pravilnika putem računarske baze podataka.

Organ nadležan za izdavanje licence, na Obrascu 1, koji je dat kao prilog ovog Pravilnika i čini njegov sastavni dio, vodi posebnu evidenciju o obrascima licenci za vozila izdatim na osnovu ugovora o leasing-u za cijelo vrijeme važenja ugovora o leasing-u.

Evidencija iz stava 2. ovog člana vodi se na računaru, u programskom jeziku "Excel".

Član 27.

U evidenciju izdatih licenci se upisuje prijevoznik tako da mu se dodijeli evidencioni broj.

Za svaki podatak koji je za određenog prijevoznika upisan u evidenciju mora biti pohranjen i dostupan datum upisa, te broj licence na osnovu koje je prijevoznik upisan.

U slučaju izmjene podataka na osnovu kojih se izdaje licenca, obrazac licence za vozilo i iskaznica za vozača mora biti u evidenciji pored novog, arhiviran i dostupan prethodno upisan podatak.

Član 28.

Pored evidencije izdatih licenci obaveza izdavaoca licence je da vodi evidenciju prijevoznika kojima je licenca oduzeta ili prestala važiti kao i obrascima licenci koji su oduzeti i prestali da važe.

Nadležno kantonalno ministarstvo vodi evidenciju o poništenim obrascima licenci za vozila u toku postupka izdavanja.

Izdavalac licence početkom svakog kvartala i po zahtjevu obavezan je dostavljati računarske baze podataka Federalnom ministarstvu prometa i komunikacija.

VI. PRIJELAZNE I ZAVRŠNE ODREDBE

Član 29.

Na dan stupanja na snagu ovog Pravilnika prijevoznici koji imaju licencu za obavljanje javnog prijevoza izdatu prema odredbama Zakona o prijevozu u unutarnjem cestovnom prometu ("Službene novine Federacije BiH", broj 23/98) nastavljaju obavljanje javnog prijevoza do isteka roka važenja licence.

Obrasci licence za vozilo, koji su prijevozniku izdati na osnovu licence iz stava 1. ovog člana prestaju važiti danom isteka te licence.

Obrasci licence za vozilo, koji su prijevozniku izdati prema odredbama Pravilnika o izmjenama i dopunama pravilnika o licenci za obavljanje prijevoza u unutarnjem cestovnom prometu ("Službene novine Federacije BiH", broj 21/06), važe do primjene novog načina registracije vozila, a najduže godinu dana od dana stupanja na snagu ovog Pravilnika.

Nastavak daljnjeg obavljanja javnog prijevoza za prijevoznike iz stava 1. ovog člana regulisan je odredbama ovog Pravilnika.

Iskaznice za vozače izdate na osnovu odredbi Pravilnika o licenci za obavljanje prijevoza u unutarnjem cestovnom prometu ("Službene novine Federacije BiH", br. 46/00, 24/03, 3/05, 56/05 i 21/06) nastavljaju da važe do isteka roka važenja licence iz stava 1. ovog člana.

Član 30.

Danom stupanja na snagu ovog Pravilnika prestaje važiti Pravilnik o licenci za obavljanje prijevoza u unutarnjem cestovnom prometu ("Službene novine Federacije BiH", br. 46/00, 24/03, 3/05, 56/05 i 21/06).

Član 31.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01/4-27-857/06
25. augusta 2006. godine
Sarajevo

Ministar
mr. **Nedžad Branković**, s. r.

